

■ CULTURA EN LUMNEZIA

Prelecziuns musicalas cun buna accoglientscha

Commemoraziun 100 onns Toni Halter en Val Lumnezia

DA MARTIN CABALZAR

Cun differents arranschaments commemorescha la Fundaziun da cultura Lumnezia el decuors da quest atun il natalezi centenar dil valent scribent romontsch Toni Halter (1914–1986). In comite da commemoraziun sut l'egida da *Roman Weishaupt* ha elaborau in program pulpiu cun differents arranschaments decentrals.

La fin d'uost ha il comite dau l'entschatta cun ina turitgada litterara sils fastitgs dil «Cavalè dalla Greina», in dils romans classics da Toni Halter. Sco guid da viadi han ins saviu engaschar *Guido Caviezel* che veva giugau perschudentamein la rolla dil cavalè el teater transcret da *Leo Tuor* ed inscenaus da *Nicolaus Caduff* 2009 a Vrin. Malgrad l'aura empau burasclusa ei tonaton in bien tozzel persunas nuota seschus stermendar ed ei semess sin viadi viers la Greina, l'anteriura pastira alpestra da cavals. Damai che Guido Caviezel ei era staus pliras stads ad alp enconuscha el da rudien la cuntrada descretta el roman ein las prelecziuns tscharnidas da Nicolaus Caduff daventadas aunc pli autenticas. Sebasond sil roman ha Caviezel schau reviver las aventuras digl anteriur cavalè ella Greina ed ha era fatg allusiun alla historia misteriusa dil cavagl alv da Blengias.

Suenter haver percurriu l'anteriura alp da cavals el Plaun dalla Greina, fastisau las restonzas dil fecler dil cavalè e pasentau la sonda sera e la notg ella camona dil Terri ha la squadra alpestra traversau la dumengia las Traviarsas per arivar sur l'Alp Diesrut puspei saunamein a Vrin. Ella halla da Vrin ha la populaziun indigena assistiu la sera ad ina registraziun da video dil teater «Il cavalè dalla Greina», daus leu cun grond success avon tschun onns.



Igl actur Roman Weishaupt e la cantadura Astrid Alexandre han delectau in publicum interessau cun lur prelecziuns musicalas ord las ovras da Toni Halter.

FOTO M. CABALZAR

Prelecziuns musicalas

Miez settember ha il comite cuntinuau cun prelecziuns musicalas che han giu liug en differents vitgs dalla Lumnezia. Aschia ha in publicum interessau assistiu allas prelecziuns musicalas che han giu liug ella cafeteria dil Da Casa Val Lumnezia a Vella, ell'ustria dalla Posta a Vrin, ella Casa Luzi a Surcasti ed ell'ustria dil Larisch a Cumbel.

Ferton ch'il teatrist Roman Weishaupt ha dau cuorts schatgs atravers la vasta litteratura dil scribent giubilar, ha la cantadura e musicista *Astrid Alexandre* schau resunar canzuns cun la viarva da Toni Halter ed accumpignau subtilmeins las prelecziuns cun sia vusch finezia ni

cugl accumpignament decent al clavazin purtabel antic. Era las prelecziuns ord la bucca scolada digl actur professional Roman Weishaupt ein stadas in delectg pils presents.

Schatg atravers l'ovra litterara

Per sias prelecziuns ha Roman Weishaupt tscharniu entginas passaschas ch'ei tipicas pigl operar litterar da Toni Halter. Ellas reflecteschan savens aspects cuntrararis sco sulegl ed umbriva, gi e notg, jester e dumiest, veta purila ed avertura turistica, tradiziun e moderna, herox ed antiherox, cooperaziun ed abandun, plaschers e permals, individualitad e cuminonza. Sco in dils pauc scri-

bents romontschs ha Toni Halter passentau bunamein sia entira veta el vitg muntagnard e romontsch ed ei s'engaschus da camifo per vitg e val. Sco scribent ei Toni Halter staus in cronist sensibel da siu temps, reflectond las midadas frapantas sin nivel litterar. Il scribent ha buca stuiu ir a tschercar ditg ses temas per l'inspiraziun litterara, els ein stai sipersi: La historia locala da vitg e val (Crestaulta, Porclas, Greina), la travaglia quotidiana da purs, luvvers e mistergners, las relaziuns e tensiuns denter il singul e la cuminonza stretga dil vitg muntagnard. Sco Toni Halter ei s'exprimius sez enzanua ha el era scret per dar a nosa gliעד savens mudergiada da cumplex d'inf-

riuradad empau dapli perschasiun propria. E quei ei reussiu meisterilmeins a Toni Halter. El ha capiu da sensibilisar lecturas e lecturs pil patrimoni historic e cultural, da promover il respect e l'amur pigl agen, carschentond la schientscha propria e rinforzond el medem mument l'identitad dalla vallada. Quei buc il davos cul legendari «Festival da Porclas». Toni Halter ei denton carschius lunsch sur las stretgas scheinas lumnezianas ora ed appartegn alla gallaria illustra dalla féffa litterara romontscha. Quei documentschaa denter auter era pliras distincziuns sco il Premi cultural Grischun, il Premi dalla fundaziun Schiller ed il Premi dall'ovra da lectura per la giuventetgna e la recepziun el Curtin d'honor a Trun. Bein convengnent e giustificau che era sia patria nativa, la Lumnezia, seregordi uonn en engrazievladad dad ina da sias pli grondas persunalitads.

La fiasta commemorativa

Actualmeins occuoran era las davosas preparativas per la fiasta commemorativa che ha liug la sonda dils 25 d'october suentermiezdi a Vella. Cun quella vegn era ina fontauna dedicata a Toni Halter, realisada tenor il concept digl artist indigen *Mattias Derungs* – che vegn pustada amiez la nova piazza da giug a Palius – inaugurada. A cooperar vegnan la Musica da Vignogn, dalla quala Toni Halter era padrin, il Chor viril Lumnezia e le greivlameins era duas gruppas da scolars. La Chasa Editura Rumantscha vegn a presentar cun quella caschun ina nov'ediziun dil «Culan da Crestaulta». Nicolaus Caduff ed *Adolf Collenberg* vegnan a render omagi a Toni Halter.

La conclusiun dil ciclus da commemoraziun fuorma allura ina serada cun tscheina da reminiscenzas che ha liug ils 22 da november a Degen.



Igl Orchester regional Peter Frey da Reinach.

MAD

Orchester Peter Frey a Mustér

Il concert duei far gust sin la Fiasta federala d'acordeon

■ (anr/hh) Il zercladur 2016 ha la 17avla Fiasta federala d'acordeon liug a Mustér. En vesta a quei arranschament cultural seprenta igl Orchester regional Peter Frey da Reinach a Mustér. Il concert ha liug sonda, ils 4 d'october 2014 allas 20.00 ella baselgia parochiala Sogn Gions. Igl orchester porta ils salids dalla regiun dalla Svizra dil nordvest. Quella ha giu renunziu al dretg d'organisar la proxima Fiasta federala d'acordeon. Sin fundament da quella renunzia ha l'Uniuin da

harmonicas Cadi decidiu da surpender l'organisaziun, aschia che quella fiasta ha liug per l'emprema ga en tiara romontscha. La fiasta sespleiga dils 3 entochen ils 5 da zercladur 2016. Rodund 300 voluntaris ein necessaris per garantir in bien andament dalla fiasta che vegn visitada da rodund 100 formaziuns dall'entira Svizra cun ver 2000 musicistas e musicists. Per il menaschi da fiasta sco tal ein pliras localitads necessarias, denter auter las hallas e salas dil center da sport e cultura. Il preventiv

dalla fiasta quenta cun cuosts da rodund 360 000 francs. Al concert da sonda proxima a Mustér presenta igl Orchester regional Peter Frey da Reinach musica d'acordeon d'emprema qualitat. Il program da concert cumpeggia rodund in tozzel tocs, denter auter duas rapsodias screttas da *Peter Frey* sez. Ina da quellas cuntegn citats da canzuns romontschas. Bein interpretadas descrivan ellas la relaziun da carstgaun e natira. Igl orchester dumbra rodund 30 musicistas e musicists.

■ MUSTÉR

Johann Janki niev menader dalla Posta

(anr/hh) La Posta a Mustér ha in niev menader. Cun igl emprer d'october 2014 surpren *Johann Janki* la funcziun dad *Adelina Riedi-Mirer*. Ella ha menau la Posta a Mustér ils davos diesch onns ed ei stada tut en tut 29 onns en funcziun dalla Posta. Cun la fin da settember eis ella ida en pensiuin. Johann Janki ei engaschus tier la Posta dapi 32 onns, da quei ils davos 19 onns sco menader dil biro a Sedrun nua ch'el habitescha

era. Cun igl emprer d'october 2014 fa la Posta era adattaziuns dil temps da spurtegl. A Mustér eis ella aviarta da gliendisdis entochen venderdis mintgamai dallas 08.30–12.00 e dallas 14.00–18.00 sco era la sonda dallas 08.30–11.00. A Sedrun ei il biro dalla Posta aviarts da gliendisdis entochen il venderdis mintgamai dallas 08.30–11.30 e dallas 14.30–17.30 sco era la sonda dallas 08.30–10.30.



Johann Janki, il niev menader dalla Posta a Mustér.

MAD